
 ■ RTR

Purschida da films e serias sin Play Suisse

(rtr/fmr) Radiotelevision Svizra Rumantscha renda attent en ina communicaziun a las medias a las purschidas rumantschas sin la nova plattform da streaming Play Suisse. Ensem cun las ulteriuras unitads da la SRG SSR ha RTR lantschà il november 2020 questa plattform ed amplifitgescha la purschida rumantscha d'in cuntin. Sin Play Suisse èn da chattar films per uffants, documentaziuns fin a l'emprima seria rumantscha «Metta da fein».

Per rumantsch u cun sottitels

Radund trais mais suenter la lantschada da la nova plattform da streaming Play Suisse èn disponiblas radund 120 contribuziuns per rumantsch ubain cun sottitels rumantschs. Uschia pon ins chattar films premiads sco «Mia vita da zucchini» (original «Ma vie de Courgette») a partir d'immediat cun sottitels rumantschs. In film che tracta dad Icare che viva persul cun sia mamma che numna el «Zucchini». Durant che Icare gioga cun las stgatladas da biera da sia mamma alcolicra, succeda in grev accident che mida per adina la vita dal mattet da nov onns.

Il film «Frontaliers disaster» represchenta la cumedia italoфона sin la plattform da streaming. Roberto Busenghi è in da blers frontaliers che passan di per di il cunfin per pudair lavar en Svizra. Pervi da la guardia da cunfin Loris J. Bernasconi vegn el però regularmain memia tard. Il destin vul che ils dus inimis natirals vegnan sfurzads a co-exister.

Ad amantas ed amants da films istorics porscha Play Suisse il film davart la perforaziun dal «Gottard», scriva RTR. Qua sa tracta dad in film svizzer che raquinta l'istorgia da l'emprim tunnel ch'è vegnì costruì a partir da l'onn 1872 tras las Alps. Era tar quest film datti sottitels rumantschs.

Als sottitels rumantschs pon ins activar cun guardar il film en il player e cun cliccar sin il simbol da nivletta sutvart a dretga. Silsuenter s'avra ina fanestra, nua ch'ins po activar ils sottitels ubain midar la lingua.

Offerta per uffants

Il film «Molly Monster» tematisescha las midadas che stattan avant porta tar la pitschna Molly, cur che la famiglia crescha. Sper quest film da 70 minutas empermettan er ils 52 filmins da «Helveticus» cun lur cuntegn instructiv intgins muments d'aha. En duas staffas vegnan tractads eveniments, atgnadads e persunalitads da la Svizra. Era tgi che s'interessa per animals e natira na vegn betg a la curta. En la seria «Super Bio Heroes» vegnan purtretads dudesch insects ed animalets indigens – ils campiuns da la biodiversitad.

Sper offertas per uffants porscha la plattform radund 80 episodas da l'emissiun «Cuntrasts» e la seria nazionala «Far Svizzers». En quatter episodas dat questa seria in'invista fitg intima en il process da naturalisaziun en Svizra.

Sper questas documentaziuns èn sa chapescha era da vesair l'emprim film rumantsch «Amur senza fin» e l'emprima seria rumantscha «Metta da fein».